

**BOSNA I HERCEGOVINA**  
**Federacija Bosne i Hercegovine**  
**TUZLANSKI KANTON**  
**V L A D A**

**NACRT**

**Z A K O N**  
**O IZMJENAMA I DOPUNAMA**  
**ZAKONA O UGOSTITELJSKOJ DJELATNOSTI**

**Tuzla, septembar 2016. godine**

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj \_\_\_\_\_, godine, d o n o s i

## **Z A K O N**

### **O IZMJENAMA I DOPUNAMA**

### **ZAKONA O UGOSTITELJSKOJ DJELATNOSTI**

#### **Član 1.**

U Zakonu o ugostiteljskoj djelatnosti („Službene novine Tuzlanskog kantona“, broj 1/12) član 10. mijenja se i glasi:

#### **„Član 10.**

#### **(Obaveze ugostitelja)**

- (1) U obavljanju ugostiteljske djelatnosti ugostitelj je obavezan:
- a) vidno istaknuti propisanu oznaku vrste na ulazu u ugostiteljski objekat utvrđenu rješenjem nadležnog općinskog/gradskog organa i kategorije ugostiteljskog objekta utvrđenu rješenjem organa nadležnog za utvrđivanje kategorije ugostiteljskog objekta;
  - b) utvrditi kućni red u ugostiteljskom objektu za smještaj i istaknuti ga na recepciji, a izvod iz kućnog reda istaknuti u svim smještajnim jedinicama;
  - c) vidno istaknuti obavijest o radnom vremenu koja je u skladu sa propisanim radnim vremenom i pridržavati se istog;
  - d) utvrditi normative o utrošku namirnica za pojedino jelo, piće i napitak, pružati usluge u količinama i kvalitetu u skladu sa normativima te, na zahtjev, normative predložiti gostu;
  - e) vidno istaknuti cijene usluga koje se nude na način dostupan gostima i pridržavati se istaknutih i ovjerenih cijena, a kod pružanja usluga smještaja u cjenovnicima istaknuti i iznos boravišne takse, te cjenovnike, na prikladan način, shodno vrsti ugostiteljskog objekata, staviti na raspolaganje gostima;
  - f) koristiti ispravna mjerila na način kojim se osigurava potrebna tačnost mjerenja, u skladu sa važećim propisima i o ispravnosti mjerila obezbijediti validnu dokumentaciju;
  - g) za svaku pruženu ugostiteljsku uslugu izdati gostu fiskalni račun, definisan posebnim propisom;
  - h) sklopiti ugovor o radu sa zaposlenim licima u skladu sa posebnim propisom;
  - i) u ugostiteljskom objektu za smještaj osigurati goste od posljedica nesretnog slučaja;
  - j) voditi poslovne knjige u skladu sa važećim propisima, opće i druge akte i poslovnu dokumentaciju (ugovore i sl.) od značaja za obavljanje registrovane djelatnosti;
  - k) alkoholna i bezalkoholna pića usluživati samo iz originalne ambalaže u skladu sa normativom, na kojoj mora biti deklaracija sa podacima o proizvođaču, odnosno uvozniku, te neto količini;
  - l) u poslovnom prostoru - objektu u momentu kontrole osigurati odobrenje za rad, odnosno rješenje o upisu u sudski registar, kao i rješenje o razvrstavanju, minimalnim uvjetima i kategorizaciji objekta.
- (2) U obavljanju ugostiteljske djelatnosti ugostitelj je dužan primjenjivati poslovne običaje propisane posebnim uzansama u ugostiteljstvu.“.

## **Član 2.**

(1) U članu 11. dodaje se novi stav (2) koji glasi:

„(2) Ovjereni normativi i cjenovnik mogu se primjenjivati narednog dana od dana ovjere.“

(2) Dosadašnji stav (2) postaje stav (3).

## **Član 3.**

(1) U članu 30. u stavu (1) riječi: “nadziranih davaoca ugostiteljskih usluga“ zamjenjuju se riječima „ugostitelja iz člana 3. ovog zakona“.

(2) Stav (2) mijenja se i glasi:

„(2) Inspekcijski nadzor nad provođenjem ovog zakona i propisa donesenih na osnovu ovog zakona, te pojedinačnih akata, uslova i načina rada ugostitelja koji pružaju ugostiteljske usluge u ugostiteljskim objektima koji nemaju obavezu da se kategoriziraju i objekata koji se na zahtjev ugostitelja mogu kategorizirati, osim Kantonalne uprave za inspekcijske poslove provodi i općinski organ uprave nadležan za inspekcijske poslove.“

## **Član 4.**

Iza člana 30. dodaju se novi članovi 30a. i 30b. koji glase:

### **„ Član 30a. (Ovlaštenja inspektora)**

U provođenju inspekcijskog nadzora nadležni inspektor Kantonalne uprave za inspekcijske poslove i općinskog/gradskog organa uprave nadležnog za inspekcijske poslove (u daljnjem tekstu: inspektor) ima ovlaštenje pregledati poslovne i druge prostorije i prostore u kojima se obavlja ugostiteljska djelatnost, poslovne knjige, ugovore, isprave i evidencije i drugu poslovnu dokumentaciju koja mu omogućava uvid u poslovanje ugostitelja koji pruža ugostiteljske usluge, te obavljati i druge radnje u skladu sa ciljem inspekcijskog nadzora.

### **Član 30b. (Način provođenja inspekcijskog nadzora)**

- (1) Ugostitelji čije su prostorije i prostori, uređaji i oprema, odnosno predmeti rada i poslovanja podvrgnuti inspekcijskom nadzoru obavezni su omogućiti inspektorima nesmetano vršenje inspekcijskog nadzora.
- (2) Ugostitelj je obavezan na zahtjev inspektora dostaviti podatke, obavijesti i materijale koji su mu potrebni za obavljanje poslova iz njegove nadležnosti u primjerenom roku koji on odredi.
- (3) Inspekcijski pregled treba u isto vrijeme biti obavljen na takav način da ne ometa redovno obavljanje rada i poslovanje.”.

## **Član 5.**

U članu 31. u stavu (1) riječi: “iz tačkaka a) i b)” zamjenjuju se riječima: “iz tačkaka f) i g)”.

## **Član 6.**

Iza člana 31. dodaju se novi članovi 31a., 31b. i 31c. koji glase:

### **„Član 31a. (Zabrana rada)**

- (1) Rješenje o zabrani rada subjektu nadzora inspektor će donijeti ako se ugostiteljska djelatnost obavlja:
  - a) bez registracije ili mimo registracije,
  - b) bez rješenja kojim se odobrava obavljanje ugostiteljske djelatnosti izdatog od nadležnog organa,
  - c) bez rješenja nadležnog organa kojim se utvrđuje da prostor, uređaji i oprema za obavljanje ugostiteljske djelatnosti udovoljavaju propisanim uvjetima za obavljanje te djelatnosti.
- (2) Inspektor će rješenje iz stava (1) ovog člana donijeti bez odlaganja, nakon što utvrdi činjenice odlučne za izvršenje rješenja.
- (3) Žalba protiv rješenja iz stava (1) ovog člana ne odlaže izvršenje rješenja.
- (4) Subjektu nadzora kojem je zabranjen rad inspektor će pečaćenjem ili na drugi pogodan način zatvoriti prostorije u kojima obavlja ugostiteljsku djelatnost.
- (5) Subjektu nadzora kojem je zabranjen rad inspektor može privremeno oduzeti opremu, uređaje, sredstva za rad i prijevozna sredstva kojima obavlja nezakonitu djelatnost do konačne odluke.
- (6) Inspektor je obavezan da u zahtjev za pokretanje prekršajnog postupka za učinjeni prekršaj, odnosno uz prijavu za učinjeno krivično djelo, o privremenom oduzimanju predmeta, odmah izvijesti nadležni organ kod kojeg pokreće postupak zbog učinjenog prekršaja ili krivičnog djela, zavisno od kvalifikacije djela učinjenog oduzetim predmetima.
- (7) Inspekcijski organi u čijem se sastavu nalazi inspekcija osigurati će uvjete za održavanje i čuvanje privremeno oduzetih predmeta.
- (8) Troškovi prinudnog izvršenja kao i troškovi štete nastale prinudnim izvršenjem padaju na teret izvršenika-stranke.

### **Član 31b. (Prestanak ispunjavanja uslova)**

- (1) Ako su poslovni prostor, uređaji i oprema namijenjeni za obavljanje ugostiteljske djelatnosti prestali ispunjavati propisane uvjete po izdatom odobrenju, inspektor će bez odlaganja, a najkasnije u roku od osam dana od dana obavljenog nadzora donijeti rješenje kojim se to utvrđuje i u kojem će odrediti rok ugostitelju, koji ne može biti kraći od 30 dana, da otkloni utvrđene nedostatke.
- (2) Ako se nedostaci iz stava (1) ovog člana ne otklone u određenom roku, inspektor će donijeti rješenje o zabrani obavljanja djelatnosti.
- (3) Žalba protiv rješenja iz stavova (1) i (2) ovog člana ne odlaže izvršenje rješenja
- (4) Ukoliko ugostitelj i poslije zabrane nastavi obavljati ugostiteljsku djelatnost, nakon što je rješenje o zabrani postalo izvršno, inspektor će donijeti zaključak o prinudnom izvršenju rješenja pečaćenjem objekta.
- (5) Troškovi prinudnog izvršenja kao i troškovi štete nastale prinudnim izvršenjem padaju na teret izvršenika-stranke.

### **Član 31c.** **(Nenadležnost inspektora)**

Ako inspektor prilikom vršenja inspekcijskog nadzora utvrdi nepravilnosti ili nepridržavanje propisa za čiji nadzor nije nadležan, obavijestit će nadležni organ uprave bez odlaganja, a najkasnije u roku od osam dana.”.

### **Član 7.**

U članu 34. stav (1) mijenja se i glasi:

„(1) Novčanom kaznom u iznosu od 1.000,00 KM do 10.000,00 KM kaznit će se za prekršaj pravno lice ako:

- a) pruža usluge smještaja i prehrane osobama koje nisu njegovi radnici, penzioneri, te članovi uže porodice radnika i penzionera (član 4. stav (1)),
- b) pruža ugostiteljske usluge u objektu zatvorenog tipa bez rješenja nadležnog općinskog/gradskog organa (član 4. stav (2)).

### **Član 8.**

Iza člana 34. dodaje se novi član 34a. koji glasi:

#### **„Član 34a.**

(1) Novčanom kaznom u iznosu od 500,00 KM do 5.000,00 KM kaznit će se za prekršaj pravno lice ako:

- a) vidno ne istakne propisanu oznaku vrste na ulazu u ugostiteljski objekt utvrđenu rješenjem nadležnog općinskog/gradskog organa i kategorije ugostiteljskog objekta utvrđene rješenjem Ministarstva (član 10. stav (1) tačka a)),
- b) u ugostiteljskom objektu za smještaj ne utvrdi kućni red i ne istakne ga na recepciji, ili izvod iz kućnog reda ne istakne u svim smještajnim jedinicama (član 10. stav 1. tačka b))
- c) vidno ne istakne na ulazu u ugostiteljski objekt obavijest o radnom vremenu ili ako ta obavijest nije u skladu sa propisanim radnim vremenom, te se ne pridržava istog (član 10. stav (1) tačka c)),
- d) ne utvrdi normative o utrošku namirnica, pića i napitaka za pojedine usluge prehrane, pića i napitaka ili ne pruži usluge u količinama i kvalitetu u skladu sa normativima ili na zahtjev gosta ne predoči mu normativ (član 10. stav (1) tačka d));
- e) vidno ne istakne cijene usluga koje nudi u ugostiteljskom objektu na način dostupan gostima, ili ako se ne pridržava istaknutih i ovjerenih cijena ili ako kod pružanja usluga smještaja u cjenovnicima ne istakne i iznos boravišne takse, te ako cjenovnici nisu dostupni gostima u dovoljnom broju primjeraka (član 10. stav (1) tačka e));
- f) ne vodi poslovne knjige u skladu sa važećim propisima (član 10. stav (1) tačka j));
- g) ne uslužuje alkoholna i bezalkoholna pića iz originalne ambalaže u skladu sa normativom, na kojoj mora biti deklaracija sa podacima o proizvođaču, odnosno uvozniku, te neto količini (član 10. stav (1) tačka k));
- h) u poslovnom prostoru - objektu u momentu kontrole ne osigura odobrenje za rad, odnosno rješenje o upisu u sudski registar, kao i rješenje o razvrstavanju, minimalnim uvjetima i

- kategorizaciji objekta (član 10. stav (1) tačka l)).
- (2) Za prekršaje iz stava (1) ovog člana kaznit će se i odgovorno lice u pravnom licu novčanom kaznom u iznosu od 200,00 KM do 2.000,00 KM.
- (3) Za prekršaje iz stava (1) ovog člana kaznit će se fizičko lice novčanom kaznom u iznosu od 150,00 KM do 1.500,00 KM.

### **Član 9.**

U članu 35. u stavu (1) u tački a) riječi: „(član 10. tačka b))“ zamjenjuju se riječima: „(član 10. stav (1) tačka g))“.

### **Član 10.**

(1) U članu 36. stav (1) mijenja se i glasi:

„(1) Novčanom kaznom u iznosu od 500,00 KM do 5.000,00 KM kaznit će se za prekršaj pravno lice ako:

- a) ne koristi ispravna mjerila na način kojim se osigurava tačnost mjerenja u skladu sa važećim propisima i o tome ne posjeduje validnu dokumentaciju (član 10. stav (1) tačka f)),
- b) u ugostiteljskom objektu za smještaj, gosti nisu osigurani od posljedica nesretnog slučaja (član 10. stav (1) tačka i)),
- c) sa zaposlenim osobama nije sklopilo ugovor o radu (član 10. stav (1) tačka h)),
- d) redovno ne dostavlja podatke o broju gostiju, broju noćenja i druge podatke (član 13. stav (5)).“.

### **Član 11.**

Ovaj zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina  
Federacija Bosne i Hercegovine  
TUZLANSKI KANTON  
Skupština

PREDSJEDNIK  
Skupštine Tuzlanskog kantona

Senad Alić, s.r.

Broj: \_\_\_\_\_  
Tuzla, \_\_\_\_\_

# O b r a z l o ž e n j e

## (1) USTAVNI OSNOV ZA DONOŠENJE ZAKONA

Ustavni osnov za donošenje Zakona o ugostiteljskoj djelatnosti sadržan je u članu III. 2. tačka h., članu III. 4. tačka k., i članu V. 6. tačka e. Ustava Federacije Bosne i Hercegovine („Službene novine Federacije Bosne i Hercegovine“, broj 1/94), članu 11. tačka m., članu 12. tačka g. i članu 24. stav 1. tačka c. Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 06/04 i 10/04).

Član III. 2. tačka h. Ustava Federacije Bosne i Hercegovine reguliše turizam kao nadležnost federalne vlasti i kantona.

Član III. 4. tačka k. Ustava Federacije Bosne i Hercegovine definiše da su kantoni posebno nadležni za stvaranje i primjenu politike kantonalnog turizma i razvoja turističkih resursa.

Član V. 6. tačka e. Ustava Federacije Bosne i Hercegovine propisuje obavezu zakonodavnog tijela kantona da donosi propise za izvršavanje kantonalnih nadležnosti.

Član 11. tačka m. Ustava Tuzlanskog kantona propisuje da je kanton posebno nadležan za utvrđivanje i provođenje politike kantonalnog turizma i razvoj turističkih resursa.

Član 12. tačka g. Ustava Tuzlanskog kantona definiše da su Kanton i Federacija nadležni za turizam.

Član 24. stav 1. tačka c. Ustava Tuzlanskog kantona propisuje da Skupština Kantona donosi zakone i ostale propise neophodne za izvršavanje nadležnosti Kantona.

## (2) RAZLOZI ZA DONOŠENJE ZAKONA

Skupština Tuzlanskog kantona je na svojoj sjednici održanoj 30.01.2012.godine, na prijedlog Vlade Tuzlanskog kantona, je donijela Zakon o ugostiteljskoj djelatnosti („Službene novine Tuzlanskog kantona“ broj 1/12) čime je uređena oblast ugostiteljstva na području Tuzlanskog kantona.

Tokom primjene ovog Zakona uočene su određene nepreciznosti vezane za obaveze ugostitelja i nadzor nad istim što je dovodilo do otežane primjene i razumijevanja Zakona.

U cilju prevazilaženja uočenih problema Ministarstvo trgovine, turizma i saobraćaja, nakon konsultacija sa svim subjektima koji su zaduženi za primjenu i nadzor nad primjenom Zakona, predlaže Vladi Tuzlanskog kantona, izmjene i dopune Zakona.

Predloženim Zakonom o izmjenama i dopunama Zakona o ugostiteljskoj djelatnosti jasno se preciziraju obaveze ugostitelja, te nadležnosti Kantonalne uprave za inspeksijske poslove i općinskih/gradskih organa uprave nadležnih za inspeksijske poslove što će u potpunosti otkloniti sve uočene nedostatke, te će u značajnoj mjeri dovesti i do zaštite korisnika ugostiteljskih usluga.

### **(3) EFEKTI OD DONOŠENJE ZAKONA**

Predloženim Zakonom postići će se:

- olakšana primjena i razumijevanje zakona,
- smanjenje sive ekonomije i rada na crno,
- preciznije definisanje nadležnosti i ovlaštenja organa zaduženih za inspekcijski nadzor nad primjenom zakona,
- bolja zaštita potrošača.

### **(4) KRATAK PREGLED ZAKONA**

Članom 1. predloženih izmjena i dopuna jasno i precizno su propisane sve obaveze koje mora ispunjavati ugostitelj dok obavlja ugostiteljsku djelatnost na području Tuzlanskog kantona.

Članom 2. propisuje se vrijeme kada na snagu stupaju normativi i cjenovnici koje moraju izraditi ugostitelji i iste ovjeriti kod nadležnog organa.

Članom 3. jasno se definišu ugostitelji kod kojih inspekcijski nadzor mogu provoditi inspektori Kantonalne uprave za inspekcijske poslove, kao i nadležni općinski/gradski organ uprave nadležan za inspekcijske poslove.

Članom 4. dodaju se novi članovi kojima se regulišu ovlaštenja inspektora u provođenju inspekcijskog nadzora, te način provođenja inspekcijskog nadzora.

Članom 5. usklađuje se norma donošenja rješenja o otklanjanju nedostataka sa propisanim obavezama ugostitelja.

Članom 6. dodaju se novi članovi kojim se reguliše izricanje mjere zabrane rada kao i primjena mjera nadzora ukoliko ugostitelj prestane ispunjavati propisane uslove za obavljanje ugostiteljske djelatnosti, te obaveza inspektora da prijavi uočene nedostatke nadležnom organu uprave ukoliko isti nije nadležan za poduzimanje odgovarajućih inspekcijskih mjera nadzora.

Članovima 7-10 propisane su kaznene odredbe koje su usklađene sa propisanim obavezama ugostitelja, a visina kazni je u skladu sa odredbama federalnog Zakona o ugostiteljskoj djelatnosti.

### **(5) OCJENA POTREBNIH SREDSTAVA**

Za provođenje ovog zakona nisu potrebna posebna sredstva iz Budžeta Tuzlanskog kantona.

**OBRADIVAČ**

**Ministarstvo trgovine, turizma i saobraćaja TK**